

tuor & ætas & palæstra ignoratur. Id ipsam etiam locum obtinet de seculo, quo Baractalis, cujus cultus est certus, martyrii palmam retulerit, nec nisi è scriptoribus recentioribus gesta quæpiam Domnini conf. qui sec. VII initio obiisse fertur, memoranda invenimus.

Ex sexu femineo.

Reparata V. M., verosimilius sub Decio passa, quæ die VIII. occurrit, diversa habet acta, quorum alia filo soluto, alia ligato sunt conscripta. Priora, utut sublestæ etiam fidei, eo tamen modo, quo à Marteneo sunt vulgata, subjungimus commentario prævio, in quo sedulo omnia, quæ ad Reparatam pertinent, discutimus. Palatiatis & Laurentiæ VV. MM. cultus sacer est certus; gesta verò planè incerta. Benedicta V. M. in agro Laudunensi est passa. Etiam si hujus acta fabulis sint respersa, ea tamen, ne immeritò à nobis culpari putentur, commentario prævio subnectimus. Præter Thaidem pœnitentem, cujus vitas duas, metricam unam, prosaicam alteram, edimus, damus etiam, interjecta primùm de Libaria V. M., quæ Tulli colitur, Sylloge, pœnitentem alteram, nomine Pelagiam, à Pelagia M., de qua simul & Dionysio ep. ac fociis MM., præmissa tamen de Palladia & Porcaria Antissiodorensibus virginibus Sylloge, egimus, verosimilius distinctam, quæ vitæ suæ, quam commentario prævio subjecimus, scriptorem æqualem Jacobum diaconum est nacta, sacroque apud varias gentes cultu evasit percelebris. De Keynæ V. genere sanctitatisque fama pauca dumtaxat in commentario, haud magnæ fidei actis, quæ ex Capgravio edimus, præmissa, notanda habuimus. Nec multa de Triduana itidem V., in Aberdonensi Scotiæ diœcesi culta, innotescunt, huicque idcirco Syllogen dumtaxat, quâ illa exponuntur, texuimus; quod & eandem ob causam de Valeria & Pollena VV. Hunonis-curriæ cultum nactis, iterumque deinde de Eusebia abbatisa ac sociabus ejus xxxix monialibus